

Preparando pa Morto

Ora un persona no tin salú, hende ta hunga un wega mentiro-so rònt di dje. Bou preteksto “Pa e enfermo no haña un shòk ku e no por soportá” nos ta skonde e bèrdat p’è. Tur hende—menos doño di kurpa—sa ku e ta muriendo.

Nos kustumber no ta korekto pa vários motibu. a) Maske nos intenshon por ta bon, nos gañamentu no ta étiko. b) Mayoría enfermo sigur lo **ke** sa. c) Doño di kurpa **mester** sa pa e por prepará pa morto.

Klaramente, ora un enfermo ta haña sa ku e no tin salú, e ta kai pisá p’è. Ma esei ta algu e mester “verwerk”. Sikólogonan ta bisa ku un enfermo lo eksperensíá sinku diferente fase emo-shonal ora e ta haña sa ku su dianan na mundu ta limitá.

1) Nenga. E no por kere—òf ta nenga kere—e diagnosis. E por pensa, “Mester tin un kibokashon. Kisas dòkter a bruha ami ku un otro pashènt. Sigur no por ta ami!”

2) Rabia. “Pakiko otro hende si ta bira bon i ami nò?” e ta rasoná. “Mi ta muchu hóben pa muri! Mi’n tin 50 aña! Pakiko ami? Mi ta bon hende! Mi yunan ta chikitu ainda i tin mester di mi! Nèt awor ora m’a kaba di hinka mi kurpa den debe!”

E enfermo por ta rabiá ku su kasá. (“Bo mester a para riba pa mi bai dòkter!”) Of e por ta rabiá ku dòkter. (“E mester a haña e problema mas promé! Ta su falta!”) Kisas e ta dirigí su kontra Dios: “Dios por a prevení mi di bira malu! Nunka mi a huma sigaria, i mi tin kanser di pulmon. Mi bisiña ta huma dos paki tur dia i ta bon bon di salú. Dios no ta hustu!” Of e por ta rabiá ku tur hende. Ta importante pa no tuma su rabia pèrsonal.

3) Negosiá. Hopi hende ta purba negosiá ku Dios. “Si Dios lagámi biba, lo mi stòp di bebe...òf lo mi bai misa tur siman...òf lo mi debilbé e fl. 100 ku mi a hòrta.”

4) Depreshon. E enfermo por ta deprimí kòrdando loke a sosodé den pasado òf loke e lo pèrde den futuro. “Aña nobo tur hende lo t’ei. Ma ami nò...”

E fase aki por ta peligroso! E enfèrmo por pèrdè speransa. E por nenga peña, kome, baña, bisti (ora e sinti bon), pasobra “tòg mi ta bai muri!” Un mentalidat asina ta aselerá su propio morto. Sin boluntat pa biba, yudansa médiko ta kasi enbano.

Durante e fase aki ta importante pa yuda e enfermo mira e banda positivo, p.e. médikonan por haña remedi nobo! Ma mu-chu mas importante ta preparashon spiritual.

5) Aseptá. Bo por yuda e enfermo sin salú aseptá su situashon dor di: a) Skucha ora e ke ekspresá su mes tokante su morto. No bis’è, “Stòp di papia ko’i kèns!” Ta importante—tantu p’è komo pa esnan ku ta keda atras—pa papia tokante su morto. b) Pèrmitié ekspresá su emoshonnan. Lágrimanan por ta algu salú. c) Preparashon spiritual ta “importantísimo” pa e enfermo sin salú pasobra esaki ta duna **forsa** i **speransa** enfrentando morto.

Nos tin miedu di morto pasobra nos tin miedu di sufrimentu, doló, i pasobra e futuro ta desconosí. Nos no sa kiko ta bin des-pues di morto. Ma esun ku a rekonosé ku e ta un pekador ku ta meresé kastigu eterno na fièrnu pa motibu di su piká i a konfia Hesu-Kristo so pa salb’è for di e kastigu, e futuro no ta deskono-sí! P’è morto ta simpelmente mudansa: “...ousente di e kurpa i na kas serka Señor” (2 Korintionan 5:8). “...nos lo ta *semper ku Señor*” (1 Tesalonisensenan 4:17). Speransa asina ta kita e temor pa morto!

Ademas, Dios a primintí Su presensia: “*Nunka lo Mi no bandonábo, i nunka lo Mi no lagabo desampará*” (Hebreonan 13:5). “...ni morto...por separá nos for di e amor di Dios ku ta den Kristo Hesus nos Señor” (Romanonan 8:38-39). Su presen-sia ta duna forza enfrentando morto!

Un dia ta bo turno pa muri! Bo ta prepará?